

L 5903a

LIBRARY  
OF THE  
UNIVERSITY OF ILLINOIS

205 20 184

SOLEMNIA  
MAGISTRO RVM  
CREANDORVM  
INAVGV RANDORVMQVE

D. XXVIII. FEBR. H. X.

INDICIT

GODOFREDVS HERMANNVS

ORD. PHILOS. H. T. DECANVS.

---

*De cantico in Romanorum fabulis scenicis dissertatio.*

7871







Quid Romani in tragoediis et comoediis canticum apellassent, fatis videbatur constare, quum Car. Aug. Boettigerus, vir celeberrimus, in dissertatione de quatuor aetatibus rei scenicae apud veteres, quam Vimariae a. cldlcccxcviii. edidit, p. 15. novam de ea re opinionem afferret. Cuius viri quo maior est in his rebus auctoritas, tanto minus mirer, si multis persuaserit. Me quidem si in his non esse profiteor, ipse, quae est eius comitas, dissentientem facile feret; aliis autem non ingratum fortasse fecero, si ostendero, cur ab eo dissentiendum putem. Sic autem ille statuit, finito quoque actu actorem primum ad tibiam saltando spectatores oblectasse, idque vocatum esse canticum. Atque hoc quidem non est dubium, quin finito actu, ante quam rursus in scenam histriones prodirent, interdum tibicen cantu tibiae aliquod spectatoribus oblectamentum exhibuerit: produxitque in eam rem Boettigerus idoneum testem, Plautum, qui in Pseudolo I. 5, 160. sic dicit:

*Tibicen vos interea hic delectaverit.*

Nihil tamen ex hoc loco aliud collegerim, quam, quod dixi, interdum hoc factum videri. Aliud, sed diversi generis exemplum, in Sticho est, actu V. scena 4, 5, et 6. Sed habet Boettigerus alium auctorem, Donatum, qui in argumento Terentii Andriae p. 85. ed. Westerh. sic scribit: *est igitur attente animadvertendum, ubi et quando scena vacua sit ab omnibus personis, ut in ea chorus vel tibicen audiri possit: quod quum viderimus, ibi actum esse finitum debemus agnoscere.* Hic vero nescio an etiam infirmet Boettigeri sententiam. Quum enim chori mentionem faciat, hoc videtur dicere, ubi in Latinis fabulis scena a spectatoribus vacua sit, ut, si istae Graecae essent fabulae, chorus vel tibicen audiri possit, ibi actum finitum debere intelligi. Certe quum



tibicinem commemoraret, respicere potuit διαύλιον. Scholiastes Aristophanis ad Ran. 1282. quem ipsum locum non neglexit Boettigerus: Φασί δὲ διαύλιον λέγεσθαι, ὅταν ἡσυχίας πάντων γενομένης, ἔνδον ὁ αὐλητῆς ᾄσῃ. Quamquam hoc incertum est. Vtut sit, illud certe e Donati verbis non videtur colligi posse, apud Romanos semper finito actu auditum esse tibicinem. Nam quid est, quod Vitruvius, qui in praefatione ad libr. V. de archit. sic scribit: *Graeci quoque poetae comici, interponentes e choro canticum, dividerunt spatia fabularum: ita partes cubica ratione facientes, intercapedinibus levant actorum pronuntiationes*: quid est, quod hic Graecos tantum comicos, non etiam Latinos commemorat? Sed aliud affert Boettigerus. In Terentii Heautontimorumeni in fine scenae secundae (primam dicere volebat) actus quinti Menedemum intro abire, ut filio Chremetis animum patris declaret, et, quum interea Chremes duo versiculos loquutus esset, redire cum huius filio, rebus omnibus transactis. Quod quoniam parum verisimile videatur, hic putat intercessisse canticum, ab actore primario ad tibiam saltatum. Quid vero, quum ibi non finiatur actus? immo, quum ibi tibicen ne potuerit quidem canere? Videamus ipsa Terentii verba.

*ME. Itane vis? CH. ita. ME. fiat. CH. ac iam, uxorem ut accersat, paret.*

*Hic ita, ut liberos est aequom, dictis confutabitur.*

*Sed Syrum. ME. quid eum? CH. egone? si vivo adeo exornatum dabo,*

*Adeo depexum, ut, dum vivat, meminerit semper mei:*

*Qui sibi me pro deridiculo ac delectamento putat.*

*Non, ita me di ament, auderet facere haec viduae mulieri,*

*Quae in me fecit.*

Hic in medio versu scena finitur, quemadmodum in eiusdem versus medio scena, quae sequitur, incipit. Parum spatii Menedemo ad res intus transigendas relictum esse fateor. At paullo plus ei concedemus. Nunc enim admodum nihil habet, qui postquam illud *quid eum* interrogavit, tamen antequam introiret, audire debuerit, quid responderet Chremes. Cur vero istud



istud *quid eum* interrogat? De Syrone ille hic sollicitus sit, ubi longe alia ei curae cordique sunt? Tu vero tribue haec verba Chremeti, qui ipse se, quid Syro facturum sit, interrogat. Ita Menedemus abierit, postquam Chremes dixerat, *ac iam, uxorem ut arcessat, paret*: satisque temporis habebit, quo rem omnem Clitiphoni paucis exponat: praesertim quum Chremes quinque reliquos versus meditabundus secum loquatur. Iam quaero, ubi hic tibicinis cantui locus sit? Vtrumne statim ut Menedemus abiit? At quis hoc ferat, Chremetem iram indignationemque suam differre, donec tibicen spectatores, nihil hic minus quam tibiae cantum desiderantes, dicamne delectaverit, an enecuerit? An vero in media Chremetis oratione? Multo mehercule minus. An denique finita ea? At in medio versu? Quin ob id ipsum in medio versu finis et initium duarum scenarum conveniunt, ut interpellari a Clitiphone Chremetis sermonem appareat. Faceat ergo hinc tibicen, cui si erat in media aliqua scena tibiis canendum, accommodatior locus monstrari poterat III. 1. post v. 98. Cum tibicine ex isto quidem Terentii loco simul, opinor, illum quoque abire iussimus, qui ibi ad tibiam saltasse dicebatur. Sed omnino unde illud, ad cantum tibicinis saltatum fuisse a quoquam, et quidem a primario histrione? De hac saltatione, inquit, accipienda sunt verba parum intellecta, quae in didascaliiis fabularum Terentianarum reperiuntur: *egit Ambivius*. Nescio quo argumento hoc dicat, mirorque placere ei interpretationem, quae ab omni verisimilitudine abhorreat, displicere illam, quae fieri vix potest quin vera sit. Nam ut tantisper concedamus, in usu fuisse aliquam inter actus mimicam saltationem, quis credat eam dignam esse habitam, quae in didascaliiis commemoraretur, quum ne ad ipsam quidem fabulam pertineret; illud autem non fuisse adnotatum, qui histriones primas partes egissent? Et cur duo fere memorantur, qui egerint? ut in Andria, in Eunuchis, in Heautontimorumenos, in Phormione: *egerunt L. Ambivius Turpio et L. Atilius Praenestinus*. In Adelphis: *egere L. Atilius Praenestinus, Minutius Prothymus*. Magis etiam rem declarat Hecyra. Ad eius primum prologum v. 1. ita scribit Donatus: *virtute actorum L. Ambivii et L. Turpionis*



*nis est commendata. Ex titulo, in quo est, egit L. Ambivius Turpio: placuit: coniciias scribendum esse, virtute actorum, et L. Ambivii Turpionis, nisi nomen actoris secundarum partium excidit. Idem ad initium secundi prologi: nam totiens expulsa fabula quomodo honeste revocari potuit in proscenium, nisi primo ipsa impudentia pro fiducia proferretur? deinde actor peritissimus ipse Ambivius probaret et poetam et comoediam, cuius auctoritas elucet ex verbis? Sed quid Donato auctore utor, quum ipse in eo prologo Ambivius v. 31. de se testimonium edat?*

*Primo actu placeo: quum interea rumor venit,  
Datum iri gladiatores, populus convolat,  
Tumultuantur, clamant, pugnant de loco:  
Ego interea meum non potui tutari locum.*

Haec, opinor, nihil dubitationis relinquunt, quid sit illud, egit Ambivius.

Sed progrediamur. De eadem ista mimica saltatione, quae inter actus exhibita fuerit, haec quoque didascaliarum verba, *modos fecit Flaccus*, intelligenda putat Boettigerus, et ita quidem, ut Flaccum pythaulen fuisse existimet. Huic quoque opinioni auctorem adhibet Donatum, cuius e libello de tragoedia et comoedia haec verba profert: *diverbia histriones pronunciabant: cantica vero temperabantur modis non a poeta, sed a perito artis musicae factis*. Quae sit huius argumenti vis, non perspicio: nisi si ita ratiocineris, quoniam inter actus tibicen cecinerit, hos modos fecisse Flaccum. At non ante sic liceret concludere, quam ubi haec tria demonstrata essent, primo, tibicinem non aliter in comoedia, nisi inter actus, auditum esse; deinde hunc tibicinis cantum vocatum esse canticum; denique modos facere esse canere tibia. Haec omnia secus esse, infra apparebit. Nunc illud quaeram, quo iure Flaccus pythaulen habeatur. Non infitior, periti tibicinis mentionem fieri in didascaliiis potuisse. Tamen multo veri similis videtur, non tibicinem, sed, quem Donatus dicit artis musicae peritum, qui modos tibicini praescripserit, intelligendum esse. Et sic hoc interpretati sunt etiam Sal-



Salmasius ad Scriptt. Hist. Aug. p. 70. et du Bos in meditationibus de poesi et pictura vol. III. p. 180. alique. Ac nisi haec vera interpretatio esset, prorsus inepte Donatus poetae mentionem inieciisset, modos non a poeta, sed a perito artis musicae factos dicens. Pergit vero ille sic: *neque enim omnia iisdem modis in uno cantico agebantur, sed saepe mutatis: ut significant, qui tres numeros in comoediis ponunt, qui tres continent mutatos modos cantici illius.* Qui huiusmodi modos faciebant, nomen in principio fabulae et scriptoris et actoris superponebant. Huiusmodi adeo carmina ad tibias fiebant, ut his auditis multi ex populo ante discerent, quam fabulam acturi senici essent, quam omnino spectatoribus ipsis antecedens titulus pronunciaretur. Haec non usque quaque aut plana aut mendo vacua sunt. Quod dicit, tres numeros, qui mutatos modos cantici contineant, in comoediis poni solitos esse, vix aliter potest intelligi, quam ut iis cantici versibus, in quibus mutabantur modi, adscriptos putemus numeros I. II. III. Simile quiddam commemorat in praefatione ad Eunuchum his verbis: *saepe tamen mutatis per scenam modis cantica mutavit: quod significat titulus scenae, habens subiectas personis litteras M. M. C.* Itaque ei scenae, in qua canticum esset mutatis modis, litterae M. M. C. quae mutari modos cantici indicarent, praemittebantur, quod etiam Salmasio placet ad Scriptt. H. A. p. 495. ipsi autem canticum, si recte coniicio, suis locis addebantur numeri I. II. III. ut, ubi fieret ista mutatio, intelligeretur. Quod inde dicit, qui huiusmodi modos fecerint, nomen in principio fabulae et scriptoris et actoris superposuisse, nemo non sentiet, scriptorem non satis apte de poeta intelligi posse. Hoc enim ad fabulam totam, non ad modos pertinebat: neque qui modos faciebat, curare opus habebat, cuius poetae ea fabula esset, sed illud erat indicandum, quis modos fecisset, et quis actor canticum, cui facti erant modi, saltaret. Quare scriptor dici videtur ille artis musicae peritus, qui modos fecerit: nec, si recte sentio, aliud quidquam continetur Donati verbis, quam in principio fabulae adscriptum fuisse id ipsum, quod in titulis ordine inverso legimus: *egerunt L. Ambivius Turpio, L. Atilius Praenestinus: modos fecit Flaccus.* Neque repugnant reliqui loci, in quibus Flacci

men-



mentionem facit Donatus: in praefatione ad Eunuchum: *item modulante Flacco Claudio tibiis dextra et sinistra, ob iocularia, mutta permixta gravitate.* Et in praefatione ad Hecyram: *modulatus est eam Flaccus Claudius tibiis paribus.* Et in praefatione ad Phormionem: *modos faciente Flacco Claudii f. tibiis Serranis.* Nam *modos fecit et modulatus est* significat ἐμελοποίησεν, ut recte indicavit Salmasius ad Scriptt. H. A. p. 70. Cicero de Or. III. 26. 102. neque id actores prius viderunt, quam ipsi poetae, quam denique illi etiam, qui fecerunt modos, a quibus utrisque summittitur aliquid, deinde augetur, extenuatur, inflatur, variatur, distinguitur. Sed redeo ad Donati locum, de quo disputabam. Ac reliqua verba ut nunc leguntur, tam sunt inepta, ut dubitari non possit, quin corrupta sint. Nam quis credat ante ipsum fabulae initium unquam carmen aliquod ex ea fabula ad tibiam cantatum esse? Potius hoc equidem Donatum dicere arbitror, usitatum fuisse, ut ante quam histriones in scenam prodirent, immo ante quam fabulae titulus pronunciaretur, tibicen tibia modos caneret eos, qui deinde canticis essent adhibendi. Quare sic scribendum puto: *huiusmodi adeo carmina assis tibiis fiebant, ut his auditis multi ex populo ante discerent, quam fabulam acturi scenici essent, quam omnino spectatoribus ipsis antecedens titulus pronunciaretur.* De ista tituli pronuncatione, in qua nunc fabulae, nunc poetae nomen primum locum tenebat, idem Donatus in praefatione ad Andriam: *pronunciataque est Andria Terenti, ob incognitum adhuc nomen poetae, et minoris apud populum auctoritatis ac meriti.* Et in praefatione ad Eunuchum: *haec edita tertium est, et pronunciata Terenti Eunuchus, quippe iam adulta commendatione poetae, ac meritis ingenii notioribus populo.* Et in praefatione ad Adelphos: *hanc dicunt ex Terentianis secundo loco actam, etiam tum rudi nomine poetae.* Itaque sic pronunciatam, *Adelphoe Terenti, non Terenti Adelphoe, quod adhuc magis de fabulae nomine poeta, quam de poetae nomine fabula commendabatur.*

Apertum iam esse arbitror, nec Flaccum pythaulen fuisse, et tibicinem cecinisse, ante quam ullus in scena actor apparuisset. Nunc videamus, quid canticum sit. Diomedes libro III. p. 489. *membra comoediarum tria sunt: diverbium, canticum, chorus.* Et statim:



tim: *diverbia sunt partes comœdiarum, in quibus diversorum personae versantur.* Tum paullo post: *in canticis autem una tantum debet esse persona, aut, si duae fuerint, ita debent esse, ut ex occulto una audiat, nec colloquatur, sed secum, si opus fuerit, verba faciat.* Et deinde:  *Latinae vero comoediae chorum non habent, sed duobus tantum membris constant, diverbio et cantico.* Et p. 488. *Latine fabulae appellantur, sive fatibulae. In Latinis enim fabulis plura sunt cantica, quae canuntur.* Vel haec satis docent, cantica, quae fere idem erant, quod apud Graecos ἀπὸ σκηνῆς vocabatur, partes ipsarum fuisse fabularum, non saltationem ad tibiam, quae inter actus spectatorum oblectandorum causa exhiberetur. Confirmant hoc etiam haec Donati, in praefatione ad Andriam: *diverbiis et canticis lepide distincta est:* ad Eunuchum: *diverbia multa saepe pronunciata, et cantica saepe mutatis modis exhibita sunt:* ad Hecyram: *cantica et diverbia summo in hac favore suscepta sunt:* ad Phormionem: *totaque diverbiis facetissimis et gestum desiderantibus scenicum, et suavissimis ornata canticis fuit.* Haec omnia apertum est sic dici, ut partes fabularum, et quidem quae non solo gestu, sed etiam oratione et cantu constiterint, intelligi debeant. Addam his Quintilianum XI. 3, 167. *pleniore tamen haec canali fluunt, vos, Albani tumuli atque luci: nam cantici quiddam habent, sensimque resupina sunt: saxa atque solitudines voci respondent.* Hoc quoque loco iam usus est du Bos in meditationibus de poesi et pictura vol. III. p. 177. Alios duos Quintiliani locos, I. 8, 2. et 10, 23. quorum alterum idem du Bos commemoravit, praetereo, quod in his incertum est, an de scenicis canticis sermo sit. Rectius huc trahi posset canticum a Macrobio Sat. II. 7. commemoratum, cuius clausula fuit, τὸν μέγαν Ἀγαμέμνονα, quod tamen, etsi ex tragoedia sumptum, non in tragoedia ab Hyla, histrione mimico, agebatur. Sed apertius Cicero ad div. IX. 22. itaque non modo in comoediis res ipsa narratur: ut ille in Demiurgo, modo (forte nosti canticum, meministi Roscium) ita me destituit nudum. Suetonius Ner. c. 39. et Datus, Atellanarum histrio, in cantico quodam, ὕδατι, πᾶτες, ὕδατι, μῆτες, ita demonstraverat, ut bibentem, natantemque faceret, exitum C. Claudii Agrippinaeque significans; et in novissima clausula, Orcus vobis ducit pedes, senatum gestu notaret. Idem Galb. c. 13. siquidem



dem Atellanis novissimum canticum exorsis, venit io simus a villa, cuncti simul spectatores consentiente voce reliquam partem retulerunt, ac, saepius versu repetito, egerunt. Hoc quidem in loco canticum est chori seu catervae. Nam quum a cantu ductum sit hoc nomen, per se non indicat, utrum unius an plurium cantus intelligatur. Itaque Vitruvius, cuius locum supra attuli, *e choro canticum* dixit, carmen a choro cantatum significans. Sic etiam Phaedrus fab. V. 7, 25.

*Tunc chorus ignotum more docto canticum*

*Insonuit, cuius haec fuit sententia:*

*Laetare incolumis Roma, salvo principe.*

Sic etiam v. 31. Inde cantores de caterva apud Ciceronem pro P. Sextio c. 55. qui Graecis *χορευταί*. Sed quum in tragoediis et comoediis apud Romanos unus tantum caneret, isque solus secum aliquid, non cum aliis, loquens, factum est, ut canticum saepissime de *μωρῶδες* diceretur, quo vocabulo usus est Donatus, canticum significans, ad Terentii Hec. V. 3, 18. Operae pretium faceret, qui cantica in Terentii Plautique fabulis a diverbiis distingueret, quod in Plauto plerumque facilius est, quam in Terentio.

Satis demonstrasse mihi videor, cantica et partes ipsarum fuisse fabularum, neque oratione et vocis cantu caruisse. Tamen nondum otium nobis facit Boettigeri disputatio. Nam hic, quum illud Plauti, de quo supra dictum est, commemorasset,

*Tibicen vos interea hic delectaverit,*

*hinc, inquit, etiam intelligi posse puto, quid in scena attitaverit Roscius ille, summus aetate Ciceronis artifex, et gestuum mira varietate et veritate laudatissimus, quid Aesopus, quid alii tragoedi et comoedi tunc temporis nobilissimi. Aluit Roscius, ut ex oratione Ciceronis pro eo novimus, gregem histrionum, quibus ipse monstraret gestus et artem histrioniam. Quotiescumque igitur operam suam aedilibus aliisque ludorum scenicorum editoribus locaret, ipse, quod summum in arte eius habebatur, egit cantica ad tibicinem, diverbiis sive dialogis gregi suo relictis. Ipsa posui viri celeberrimi verba, quo ne dubium esset lectoribus, Roscium*  
Aeso-



Aesopumque ei vifos esse nihil praeter cantica egisse, et haec quoque expressisse tantum gestu, non pronunciaſſe aut cecinisse. Non vereor, ne cui hoc credibile videatur, praefertim recordanti, quae Plutarchus de Cicerone in vita eius ſcribit p. 1582. ed. Steph. λέγεται δὲ καὶ αὐτὸς εἶδέν ἦττον νοσήσας τῷ Δημοσθένει πρὸς τὴν ὑπόκρισιν, τῷτο μὲν Ρωσικῷ τῷ κωμῳδῷ, τῷτο δ' Αἰσώπῳ τῷ τραγῳδῷ προσέχειν ἐπιμελῶς. At, inquis, habebat fortasse vir doctissimus, quae pro sua illa opinione afferret. Videamus. Vtrumne haec Ciceronis pro Archia 8. 17. *quis nostrum tam animo agresti ac duro fuit, ut Roscii morte nuper non commoveretur? qui quum esset senex mortuus, tamen propter excellentem artem ac venustatem videbatur omnino mori non debuisse.* Ergo ille corporis motu tantum amorem sibi conciliarat a nobis omnibus: nos animorum incredibiles motus celeritatemque ingeniorum negligemus? Sane ita hic loquitur Cicero, ac si omnis Roscii ars in solo corporis motu posita fuisset. Verum quis non intelligat, in histrione, praefertim si cum poeta comparetur, gestum magis, quam quidquam aliud, laudari debuisse? An hoc afferet eiusdem Ciceronis in III. de orat. 26. 102. *numquam agit hunc verſum Roscius eo gestu, quo potest,*

*Nam sapiens virtuti honorem praemium, haud praedam, petit,*

*ſed abiicit prorsus, ut in proximos,*

*Et quid video, ferro ſeptus poſſidet ſedes ſacras, incidat, adſpiciat, admiretur, ſtupeſcat. Quid ille alter:*

*Quid petam praefidi?*

*quam leniter, quam remiſſe, quam non actuoſe. Inſtat enim,*

*O pater, o patria, o Priami domus,*

*in quo tanta commoveri actio non poſſet, ſi eſſet conſumpta ſuperiore motu et exhauſta. At licebit monere, agere actorem dici etiam ea, quae cum motu geſtuque aliquo pronunciat. Diomedes p. 488. nam et agi fabula, non referri ab actoribus dicitur. An denique hoc proferet ex I. de or. 60. 254. ſolet idem Roscius dicere, ſe, quo plus ſibi aetatis accederet, eo tardiores tibicinis modos et cantus remiſſiores eſſe*



*facturum. Cum quo loco alius congruit de legg. I. 4. 11. quemadmodum Roscius, familiaris tuus, in senectute numeros in cantu leniverat (sic fortasse pro cecinerat scribendum) ipsasque tardiores fecerat tibias. Haec vero per se sola non multum probatura essent, quum neque aperte indicetur, cecinisse alium, quam ipsum histrionem, neque, si ita factum est, non egisse eum diverbia appareat. Sed accedit fortasse aliquid ponderis ex his locis. T. Livius VII. 2. Livius post aliquot annos, qui ab saturis ausus est primus argumento fabulam serere, (idem scilicet, id quod omnes tum erant, suorum carminum actor) dicitur, quum saepius revocatus vocem obtudisset, et enia petita puerum ad canendum ante tibicinem quum statuisset, canticum egisse aliquanto magis vigenti motu, quia nihil vocis usus impediabat: inde ad manum cantari histrionibus coeptum, diverbiaque tantum ipsorum voci relictas. Valerius Maximus II. 4, 3. de eodem Livio: isque sui operis actor, quum saepius a populo revocatus vocem obtudisset, adhibito pueri et tibicinis concentu, gesticationem tacitus peregit. Lucianus de saltatione c. 30. T. II. p. 286. παλαι μὲν γὰρ αὐτοὶ καὶ ἥδον καὶ ὠρχέοντο· εἴτ', ἐπειδὴ κινεμένων τὸ ἄσθμα τὴν ᾠδὴν ἐπετάραττεν, ἄμεινον ἔδοξεν ἄλλης αὐτοῖς ὑπάδειν. Gellius XX. 3. Sicinnium genus veteris saltationis fuit. Saltabundi autem canebant, quae nunc stantes canunt. Isidorus Orig. XVIII. 44. orchestra autem pulpitus erat scenae, ubi saltator agere posset, aut duo inter se disputare. Ibi enim poetae comoedi et tragoedi ad certamen conscendebant, iisque canentibus alii gestus edebant. Alium locum Eusebii in chronico p. 155. Pylades Cilix pantomimus, quum veteres ipsi canerent et saltarent, primus Romae chorum et fistulam sibi praecinere fecit, accurate tractavit Salmasius ad Scriptt. H. A. p. 491—504. ostenditque alio spectare, quam ad hunc morem, de quo Livius et Valerius Maximus loquuntur. Ex his vero luce clarius apparet, histriones diverbia pronunciasse, cantica autem egisse tantum, canente alio. Et, si hic mos, ut ex Livii verbis videtur colligi posse, semper observatus est, hoc certe extra dubitationem erit positum, Roscium Aesopumque cantica tacentes egisse, sive saltasse. Saltare enim tragoediam dicitur, qui gestus agit; cantare, qui versus canit. Vnde saltare proprium est histrionis, cantare cantoris. Distincte de utraque re loquitur Suetonius in Caligula c. 54. idem cantor, atque saltator. Et statim:*

*canendi*



*canendi ac saltandi voluptate ita efferebatur, ut ne publicis quidem spectaculis temperaret, quo minus et tragoedo pronuncianti concineret, et gestum histrionis, quasi laudans vel corrigens, palam effingeret. Idem in Nerone c. 46. observatum etiam fuerat, novissimam fabulam cantasse eum publice, Oedipodem exsulem, atque in hoc defuisse versu:*

*Δαεῖν μ' ἄνωγε σύγγαμος, μήτης, πατήρ.*

Sed haec iam accuratissime exposuit Salmasius ad Scriptt. H. A. p. 352 et 503. Alia vero hic oritur quaestio, semperne cantica ab aliis cantata fuerint, quam a quibus gestu exprimerentur, an interdum etiam histriones ipsi simul et saltaverint et cantaverint fabulam. Hoc postremum colligas fortasse ex his Suetonii verbis in Nerone c. 21. *tragoedias quoque cantavit personatus. Inter caetera cantavit Canacen parturientem, Oedipodem excaecatam, Herculem insanum. In qua fabula fama est tirunculum militem, positum ad custodiam aditus, quum eum ornari ac vinciri catenis, sicut argumentum postulabat, videret, accurrisse ferendae opis gratia. At hic quidem, ut praecedentia docent, et Dio Cassius in fine libri XLI. de citharoedis sermo est, cantica e Graecis fabulis cantantibus. Eodemque Plinii locus spectat in Hist. Nat. XXXVII. 2. sect. 7. quem recte explicuit Casaubonus ad Suetonii locum. Sed Horatius aperte cantorem et histrionem eundem esse significat, quum dicit,*

*donec cantor, vos plaudite, dicat.*

Sunt, qui eodem referant etiam haec Ciceronis in orat. pro P. Sextio c. 55. *nam quum ageretur togata, Simulans, ut opinor, caterva tota, clarissima concentione in ore impuri hominis imminens concionata est, huic vitae tuae, et, post principia atque exitus vitiosae vitae. Sedebat exanimatus: et is, qui antea cantorum convivio conciones celebrare suas solebat, cantorum ipsorum vocibus eiiciebatur. Sed de hoc loco quid sentiam, supra indicatum est. Quin fateor potius, nihil dum me reperisse, unde certo intelligi posset, histrionem cantica interdum etiam cecinisse. In quam rem mox proferam locum Ciceronis non minus memorabilem, quam quae supra e III. de or. 26. 102. attuli, ubi de Aesopo canticum agente sic loquitur, ut non sine causa solum gestum, non etiam vocem*

*can.*



cantumque commemorare videatur. Sed priusquam istuc veniam, illud non est praetereundum, quod Boettigerus Roscium Aesopumque non nisi cantica egisse, diverbia autem gregibus suis reliquisse dicit. Quis enim, etiam si omnes ea de re scriptores tacerent, sibi persuadeat, Ballionem et Aiace in canticis ab Roscio et Aesopo, in diverbiis ab alio ignobiliore actore actum esse? quis, ut caetera praeteream, non videat, si qua scena, ut saepe, e cantico in diverbium abibat, non potuisse actorem, finito cantico, sine summa offensione spectatorum de medio tolli, aliumque eius loco Ballionem vel Aiace suffici? Quod si opus est in re per se minime dubia testes afferre, apertum faciam, et Roscium et Aesopum etiam diverbia non solum egisse, sed etiam pronunciasse. Cicero de off. I. 31. 114. *ne scenici plus quam nos videantur habere prudentiae. Illi enim non optimas, sed sibi accommodatissimas fabulas eligunt; qui voce freti sunt, Epigonos, Medumque; qui gestu, Melanippam, Clytaemnestram: semper Rupilius, quem ego memini, Antiopam; non saepe Aesopus Aiace.* Idem de or. I. 27. 124. *caeterarum homines artium spectati et probati, si quando aliquid minus bene fecerint, quam solent, aut noluisse, aut valetudine impediti non potuisse consequi id, quod scirent, putantur. Noluit, inquit, hodie agere Roscius; aut, crudior fuit.* Et c. 61. 258. *itaque nos raucos saepe attentissime audiri video: tenet enim res ipsa atque causa; at Aesopum, si paullum irrauserit, explodi.* Et II. 46. 193. *quid potest esse tam fictum, quam versus, quam scena, quam fabulae? tamen in hoc genere saepe ipse vidi, quum ex persona mihi ardere oculi hominis histrionis viderentur, spondalia illa dicentis:*

*Segregare abs te ausus, aut sine illo Salamina in-*  
*gredi?*

*Neque paternum adspectum es veritus?*

*Numquam illum adspectum dicebat, quin mihi Telamon iratus furere luctu filii videretur. At (sic scribe) idem inflexa ad miserabilem sonum voce,*  
*quem aetate exacta indigem*

*Liberum laceraasti, orbaasti, exstinxti; neque fratris*  
*necis,*

*Neque gnati eius parvi, qui tibi in tutelam est tra-*  
*detus,*

*flens*



*flens ac lugens dicere videbatur. Et in epist. ad div. VII. 1. deliciae vero tuae, noster Aesopus, eiusmodi fuit, ut ei desinere per omnes homines liceret. Is iurare quum coepisset, vox eum defecit in illo loco, si sciens fallo. Iamne apparet, non mutos in scena stetisse Roscium et Aesopum? Sed non possum, quin moneam, in hoc postremo Ciceronis loco observandum esse ter positum verbum dicere. Unde apparet, non esse haec cantata. Et recte, ut in diverbio Telamonis et Teucris, quod contra, quae in Quaeest. Tusc. I. 44. 106. ex cantico quodam deprompta affert, pressis et flebilibus modis, qui totis theatris maestitiam inferant, concini, septenariis ad tibiam fuis, narrat. Indidem colligitur, vitiosum vocabulum spondalia, neque in spondalia, ut videbatur Adr. Turnebo, neque in spondaulia, ut Salmasius volebat, mutari posse: quae coniecturae etiam propter alias causas admitti nequeunt. Codd. praeter vulgatam lectionem etiam spondali illa et spondalli illa habent. Quod si venia est de loco tam desperato suspicionem aliquam proferenti, facilius mihi persuadeam, litteras si vel Ili errore librario- rum ex sequente illa natas esse, quum Cicero scripsisset, e sponda illa dicentis. Non inepte certe credas Telamonem, cuius corpus, ut ipse in illa fabula de se praedicat apud Nonium p. 159. annisque et aetate putrebat, quum accepto de filii morte nuncio in lectulo consedisset, e sponda increpare Teucrum; Aesopumque, quod senile corpus ad iram furoremque gestu satis exprimendum vix esse idoneum sentiret, tanto magis sensus istos oculis significasse. Iam denique, quo res conficiatur, illum videamus locum, de quo supra dixi, in oratione pro P. Sextio, c. 56. Quid fuit illud, quod, recenti nuncio de illo senatusconsulo, quod factum est in templo Virtutis, ad ludos scenamque perlato, confessu maximo, summus artifex, et mehercule semper partium in republica, tamquam in scena, optimarum, flens et recenti laetitia, et misto dolore ac desiderio mei, egit aperte multo gravioribus verbis meam causam, quam egomet de me agere potuissem? Summi enim poetae ingenium non solum arte sua, sed etiam dolore exprimebat: quid enim? qui rempublicam certo animo adiuverit, statuerit, steterit cum Achivis. Vobiscum me stetisse dicebat: vestros ordines demonstrabat: revocabatur ab universis. Re dubia nec dubitarit vitam offerre, nec capiti pepercit.*



rit. Haec quantis ab illo clamoribus agebantur, quum iam, omisso gestu, verbis poetae, et studio actoris, et expectationi nostrae plauderetur? Summum amicum, summo in bello, (nam illud ipse actor adiungebat amico animo, et fortassis homines propter aliquod desiderium approbabant) summo ingenio praeditum. Tum illa quanto cum gemitu populi Romani ab eodem paullo post in eadem fabula sunt acta: o pater — Me, me ille absentem, ut patrem, deplorandum putabat, quem Q. Catulus, quem multi alii saepe in senatu patrem patriae nominarant. Quanto cum fletu de illis nostris incendiis ac ruinis, quum patrem pulsum, patriam afflictam deploraret, domum incensam everSAMque, sic egit, ut, demonstrata pristina fortuna, quum se convertisset, haec omnia vidi inflammari, fletum etiam inimicis atque invidis excitaret. Pro dii immortales, quid, illa quemadmodum dixit idem, quae mihi quidem ita et acta et scripta videntur esse, ut vel a Catulo, si revixisset, praeclare posse dici viderentur. Is enim libere reprehendere et accusare populi nonnumquam temeritatem solebat, aut errorem senatus: o ingratis Argivi, inanes Graii, immemores benefici. Non erat illud quidem verum: non enim ingrati, sed miseri, quibus reddere salutem, a quo acceperant, non liceret: neque unus in quemquam umquam gratior, quam in me universi: sed tamen illud scripsit disertissimus poeta pro me; egit fortissimus actor, non solum optimus, de me, quum omnes ordines demonstraret, senatum, equites Romanos, universum populum Romanum accusaret: exsulare finitis, sistis pelli, pulsum patimini. Quae tum significatio fuerit omnium, quae declaratio voluntatis ab universo populo Romano in causa hominis non popularis, equidem audiebamus: existimare facilius possunt, qui adfuerunt. Et, quoniam me hic provexit oratio, histrio casum meum toties collacrimavit, quum ita dolenter ageret causam meam, ut vox eius illa praeclara lacrimis impediretur. Neque poetae, quorum ego semper ingenia dilexi, tempori meo defuerunt: eaque populus Romanus non solum plausu, sed etiam gemitu suo comprobavit. Virum igitur haec Aesopum potius pro me, aut Attium dicere oportuit, si populus Romanus liber esset, an principes civitatis? Nominatim sum appellatus in Bruto: Tullius, qui libertatem civibus stabiliverat. Millies revocatum est. Iam nemini posthac, spero, in mentem veniet, Roscium Aesopumque diverbia gregibus suis reliquisse, ipsos autem sola egisse cantica, nec vocem eorum in scena



scena esse auditam; multo minus, canticum dictum esse, si quando tibicen finito actu tibia cecinerit, aut ad istos tibicinis sonos actorem aliquem, et quidem primarum partium, nescio quid mimica saltatione expressisse. Sed illud non est in hoc Ciceronis loco negligendum, quod neque canere usquam dicit Aesopum, neque haec, quae in cantico erant, dicta ab eo, sed, quasi studiose illo verbo abstinens, acta refert. Quo fit, ut certe non labefactetur illud, quod Livius scribit, sola ab histrionibus diverbia pronunciata esse. Illa enim, *o pater*, et, *haec omnia vidi inflammari*, ex cantico esse, nisi metra docerent, ipse testatur Cicero in Quæst. Tusc. I. 35. *at certe ei melius evenisset, nec tam flebiliter illa canerentur*,

*Haec omnia vidi inflammari,*

*Priamo vi vitam evitari,*

*Iovis aram sanguine turpari.*

Et III. 19. quum et hos versus, et illos, *o pater*, commemorasset, addit: *praeclarum carmen: est enim et rebus, et verbis, et modis lugubre.*

Sed veniendum mihi iam est ad id, quod huic edendae dissertationi opportunitatem fecit. Indicenda est enim sollemnis creatio doctorum philosophiae, quae d. XXVIII. Febr. h. X. in Auditorio maiore sic, ut mos a maioribus traditus est, peragetur. Ea hoc anno iucundissimum nobis imponit officium gratulandi, nostramque significandi laetitiam, quod ex iis, qui ante hos L. annos ab Ordine nostro creati sunt artium magistri, duo supersites sunt venerandi senes,

VIR EXCELLENTISSIMVS

IOANNES AVGVSTVS TITTMANNVS

PROFESSOR MATHESIOS EMERITVS IN DRESDENSI

GYMNASIO MILITARIS NOBILIVM TIROCINII



VIR PLVRIMVM REVERENDVS  
IOANNES GOTTLOBVS SCHVBERTVS

SACRORVM ANTISTES ÜCHTERITII  
PROPE LEVCOPETRAM

quorum virorum ut placida sit et hilaris senectus, ex animo optamus, simulque speramus, hanc recordationem honorum, quos ante dimidiatum saeculum consequuti sunt, tanto iis iucundiores fore, quanto feliciores ob illud providentiae divinae beneficium habendi sunt. Die igitur illo, quem dixi, primo qui tabulis publice propositis hoc anno philosophiae doctores et artium liberalium magistri declarati sunt, renunciabuntur:

VIR PLVRIMVM REVERENDVS ET DOCTISSIMVS  
IOANNES GVILIELMVS EBEL

SACRORVM HERMSDORFII IN BORYSSIA ORIENTALI ANTISTES

FRIDERICVS AVGVSTVS BENIAMIN PVCHELT

BOHNSDORFIO LVSATVS  
MEDICINAE BACCALAVREVS

GODOFREDVS AVGVSTVS BENEDICTVS WOLFF

LAVCHA THVRINGVS  
MVNC LYCEI GV BENENSIS CORRECTOR

Antiquo autem ritu deinde hi creabuntur:

CAROLVS FRIDERICVS HAASE

LIPSIENSIS  
MEDICINAE BACCALAVREVS



CHRISTOPHORVS GOTTLOBVS ROHNE

ISLEBIENSIS

CATECHETA AD AEDem QVAE CONNEVITII EST

IOANNES GOTTHELF CAROLVS ROSE

LIPSIENSIS

FRIDERICVS AVGVSTVS ZINSMANN

LVNZENAVIA MONTANVS

FRIDERICVS AVGVSTVS BORNEMANN

GROSSENHAYNA MISNICVS

LEOPOLDVS AVGVSTVS GVILIELMVS HENNICKE

ROSLEBENENSIS

Hanc igitur solemnitatem ut Vos, Magnifice Rector, Celsissime Princeps, Illustrissimi Comites, Gravissimi Proceres ac Fautores Academiae, Generosissimi et Humanissimi Commilitones, praesentia vestra celebriorem reddere velitis, qua decet observantia rogamus. P. P. in Vniversitate Litterarum Lipsiensi Domin. Estomihi a. c1o1occcxi.

---

 L I P S I A E

EX OFFICINA KLAUBARTHIA.













3 0112 115882737